

1 **Din ed ils pertschiants**

2 Eu nu'm less glorifichar, poss però dir ch'eu d'eira ün scolar mediocar. In matematica
3 d'eira plüchöntsch sur la media. Far quints d'eira mia fermezza. Perquai esa chapibel
4 ch'eu n'ha frequentà la scoula da commerzi e sun daspö ons contabel diplomà in
5 ün'impraisa d'importanza naziunala.

6 Però da las jadas squassa il cheu, pensond a meis conscolar da plü bod, Din. Quel
7 ha bain fat tuot ils ons da la scoula obligatorica da cumün, ma na tuot las classas. Illa
8 vita s'ha Din però cumprovà talmaing, ch'eu sun minchatant quasi schiglius.

9 Din posseda üna fabrica chi gira, ha üna villa da luxus ed üna chasa da vacanzas in
10 ün lö da bellezza sper il lai da nos cumün d'origen. Üna jada, d'ürant il temp da
11 vacanzas, am n'haja inscuntrà cun Din e nus vain rinfras-chà algordanzas da plü bod
12 ed eu n'ha tut l'ocasiun per eruir il motiv dal success professiunal da meis cumpogn
13 da scoula da plü bod.

14 Din es stat reservà ün mumaint e m'ha lura confidà il seguaint detagl: „Tü sast ch'eu
15 d'eira üna nolla in scoula primara!“

16 „Üna nolla nu lessa güst dir“, respuond eu e cuntinuesch „però far quints nu d'eira tia
17 fermezza.“

18 „Güst perquai n'haja pensà“, piglia Din darcheu il pled „da bandunar uschè svelto sco
19 pussibel il banc da scoula e far il sagl oura aint illa vita pratica.“

20 „Che giarsunadi hast fat?“

21 „Che giarsunadi da quel temp! Nouv ons scoula han bastü e lura ün sagl sco ün vadè
22 oura aint illa vita pratica.“

23 „I fa l'impreschiun cha la vita da professiun at saja reuschida?“

24 „Eu n'ha lavurà duos ons e davo la scoula da recruta n'haja miss sü ün affar.“

25 „Bain ün affar da prodüer barschuns?“

26 „Exact sco cha tü dist.“

27 „E co hast fat culs quints?“

- 28 „Quai es bod stat plü simpel co la lavur manuala da la bunura bod fin tard la saira.“
- 29 „Ma co lura?“
- 30 „Eu at vögl dir quai cun ün exaimpel. Ils cuosts da fabricaziun d'eiran ün franc per
31 barschun. Eu vend il singul toc per trais francs e cun quels duos pertschient guadogn
32 n'haja gnü üna buna existencia ed eu stun bain“, accentuescha Din illa maniera d'üna
33 persunalità rivada.
- 34 Eu n'ha stuvü travuonder vöd plüssas jadas e lura n'haja guardà directamaing sün
35 Din e n'ha dit:
- 36 „Quai sun pelvaira stats buns pertschients!"

(tenor Toni Berther)